

“Pažnja Evrope i svijeta usmjerena je na BiH”

Sljedećih nekoliko dana, pa čak i sati, biće ključni za budućnost BiH. Pažnja Evrope i svijeta usmjerena je na Bosnu i Hercegovinu, u momentu kada njeni lideri treba da donesu odluku o tome da li će iskoristiti priliku da prvim istorijskim koracima krenu ka NATO-u i evropskim sigurnosnim strukturama.

Danas se svi ambasadori Evropske unije susreću sa Predsjedništvom BiH kako bi apelovali na njih da ne propuste ovu priliku da oružane snage BiH stave pod kontrolu države, da sve njene vojnike obuku u iste uniforme, u kojima će krenuti ka NATO-u. Sutra u Sarajevo dolaze politički direktori Vijeća za implementaciju mira, gdje će biti informirani o odbrambenim reformama kao i drugim procesima reforme koji su trenutno u toku. Vojni komitet NATO-a, u kome se nalaze neki od najviših vojnih oficira iz 19 zemalja članica NATO-a, također sutra dolazi u BiH, gdje će biti informiran o procesu odbrambene reforme.

Vijeće za implementaciju mira će se sastati u četvrtak i petak. Oni će dati svoju ocjenu o tome da li su politički lideri BiH spremni da pokažu političku i državničku zrelost da podrže reforme koje su potrebne da ovu zemlju uvedu u transatlanske strukture. Biće im prezentirani izvještaji predsjedavajućih svake od tri komisije o napretku postignutom u oblasti reforme carina odnosno PDV-a, odbrane i obavještajne djelatnosti.

Visoki predstavnik je duboko uvjeren da upravo članstvo najprije u programu Partnerstvo za mir a zatim i u NATO-u Bosni i Hercegovini nudi najbolje garancije za dugoročni mir i stabilnost. On će Vijeću za implementaciju mira reći da bi

bila tragedija ukoliko bi BiH odbacila ovu istorijsku priliku da građanima ove zemlje podari mirnu budućnost.

No on će također istaći da se odluka o tome nalazi u rukama političkih lidera BiH. NATO od organa BiH očekuje da to sami urade. On će Vijeću za implementaciju mira reći da ove odbrambene reforme, a nakon njih i reforme u oblasti indirektnog oporezivanja te obavještajne djelatnosti, predstavljaju najveći test za međunarodni kredibilitet BiH od kada je on preuzeo dužnost visokog predstavnika.